

Premi grischun da cultura 2026

Katharina Vonow (1951), pictura / dissegnadra / fotografa, Rodels

La Regenza surdat a Katharina Vonow il Premi da cultura 2026. Enconuscenta sco fotografa e fotoreportadra, va ella gia baud ora en il mund, fa ina scolaziun da guaridra, sa perfecziunescha sco artista figurativa e sco pictura, turna puspè a chasa, malegia, dissegna, instruescha e cumenza puspè a fotografar. Cun il Premi da cultura 2026 undrescha la Regenza la vita e la ritga ovra da l'artista.

Premis da renconuschientscha

Maria Dietrich-Kienberger (1952), Felix Dietrich (1950), Urs Kienberger (1950), hoteliers / promoturs ed organisaturs d'occurrenz culturalas en il Waldhaus, Segl Maria

La Regenza surdat als hoteliers Maria Dietrich-Kienberger, Felix Dietrich ed Urs Kienberger da l'Hotel Waldhaus a Segl Maria in premi da renconuschientscha. Sco pioniera e pioniers collian els trais il turissem cun cultura ed art – sco proviant per l'olma e sco model da fatschenta. Dapi decennis lavuran els a favur da la pussibilitaziun, da la promoziun e da l'encuraschament da l'architectura, da l'art e da la cultura.

Jachen Erni (1946), musicant e perscrutader da musica populara, Scuol

La Regenza surdat a Jachen Erni in premi da renconuschientscha. Ella undrescha in amatur passiunà da la musica populara, che ha scrit sco etnograf ina istorgia da sia musica e che tgira dapi blers onns la baselgia San Niclà a Strada.

Luciano Fasciati (1960), gallerist / curatur, Cuira

La Regenza surdat a Luciano Fasciati in premi da renconuschientscha. Il gallerist metta a disposiziun a l'art contemporan d'entaifer e d'ordaifer il Grischun in fund, ina tribuna ed atenziun. El ha francà la Bregaglia, Cuira e dacurt il Mesauc sin la charta geografica da l'art.

Alessandra Jochum-Siccardi (1968) e Pierluigi Crameri (1962), persunas da museum, Valposchiavo

La Regenza surdat ad Alessandra Jochum-Siccardi ed a Pierluigi Crameri in premi da renconuschientscha. Sco perscrutadra e collecziunader, sco autura ed organisatur d'exposiziuns s'occupan els dapi blers onns da l'istorgia dal Puschlav ed han stgaffi ina ritga collecziun da fotografias.

Mario Pacchioli (1981), musicist, Losanna, Frantscha e Rabiis

La Regenza surdat a Mario Pacchioli in premi da renconuschientscha. Da giuven è il musicist sursilvan d'aventà in «MusicStar»; el ha lavurà vi da sasez e vi da ses art; en l'Europa è el en viadi cun grond success sco cumponist, chantadur ed actur – er sco ambassadur musical da la cultura rumantscha.

Priska Roth (1975), istoricra, Soglio / Haldenstein

La Regenza surdat a Priska Roth in premi da renconuschientscha. L'istoricra ha scrit ina istorgia da sia val, la Bregaglia. Ella n'è betg ina scienziada che sa zuppa en l'archiv, mabain ina che va ora en il mund: averta e mirvegliusa.

Maurice Steger (1971), musicist, Landquart / Turitg

La Regenza surdat a Maurice Steger in premi da renconuschientscha. Sco virtuos da flauta è il musicist en viadi sin l'entir mund. E suna adina puspè en il Grischun. El n'è betg mo in fitg bun musicist, mabain er dirigent, magister e perscrutader da la musica dal baroc.

Tessanda Val Müstair, artistas da tessaria, Sta. Maria Val Müstair

La Regenza surdat a las dunnas da la Tessanda in premi da renconuschientscha. Ellas portan lur vegl artisanadi en il temp nov, collian inschigns tradiziunals cun design contemporan ed han il curaschi da construir cun Peter Zumthor ina nova manufactura en la Val Müstair.

Premis da promoziun

Davina Andrea Deplazes (1999), artista, Surrein

La Regenza surdat a Davina Andrea Deplazes in premi da promoziun. L'artista figurativa stgaffescha sculpturas spectacularas. Ella ha ina gronda chapientscha per spazi e tecnica, che furman la basa da ses art.

Simon Gabriel (2008), musicist, S-chanf

La Regenza surdat a Simon Gabriel in premi da promoziun. Il musicist da 18 onns è in maister da la trumbetta, che vegn festivà lunsch enturn. El dastga quintar cun ina gronda carriera.

Teater Giuven Grischun (fundà il 2011), Cuira

La Regenza surdat al Teater Giuven Grischun in premi da promoziun. Ad uffants da tut las trais culturas linguisticas dal Grischun avra quest teater la porta a l'art ed a la cultura.

Anna Stricker (2002), sautunza, Tavau

La Regenza surdat ad Anna Stricker in premi da promoziun. Dapi sia uffanza viva la sautunza ses siemi – scuvrir e mesirar il mund cun sa mover. Cun «contemporary dance» stat ella sin tribuna, concepescha represchentaziuns ed instruescha er gia sautunzas e sautunzs pli giuvens.

Cilgia Zangger (1998), illustratura, Silvaplauna / Lucerna

La Regenza surdat a Cilgia Zangger in premi da promoziun. L'illustratura è narra d'istorgias, ch'ella munescha plain fantasia cun figuras e colurs. Sco creadra ha ella chattà – cun rispli e cun iPad – in ferm stil individual.